


三渠先生集

上



重刻三渠先生集目錄十二之十三 七

卷之十二

墓誌

四川按察司僉事楊公墓誌銘

監察御史華嵩東公配孺人張氏墓誌

銘

石泉師公配田氏墓誌銘

諡封恭人陳繼母高氏墓誌銘

鎮江府通判鮑陂黃公配魏氏墓誌銘



都察院右都御史兼兵部左侍郎太華
何公配封淑人李氏墓誌銘

工部都水司員外郎槐陂馮公墓誌銘
昭勇將軍都指揮僉事渭西朱先生配

贈淑人蕭氏繼封淑人張氏墓誌銘

封太恭人馮母鄭氏合葬墓誌銘

韓府左長史芝田陳君墓誌銘

山西高平縣主簿東川張公暨配孀人

李氏合葬墓誌銘

卷之十三

墓誌

松山劉公合葬墓誌銘

都轉鹽運司知事封中憲大夫鳳陽府

知府引渠盧公配贈恭人劉氏墓誌

銘

戶部山西司郎中兩溪孫君墓誌銘

封平江伯夫人崔氏墓誌銘

廣林維公配張黃孫孀人墓誌銘

絳縣知縣唐公墓誌銘

思榮壽官雙泉韓公配孺人趙氏墓誌銘

太學生李純夫配王氏墓誌銘

晉府左長史竹谷馬先生墓誌銘

張季公配孺人宋氏合墓墓誌銘

後岡呂君墓誌銘

贈通議大夫都察院右副都御史張公

配淑人孟氏合墓墓誌銘

重刻三渠先生集卷之十二 土

志銘

四川按察司僉事楊公墓志銘

四川按察司僉事楊公于嘉靖八年己丑二月廿五日歿于臬邸其子守正聞訃哀經請余曰哀哉吾父已矣茲惟有墓銘以慰諸幽敢圖之執事余惟公昔與家君同舉進士官內臺誼至厚也惡可辭公諱秦字濟之別號雪堂其先爲山西潞城縣人洪武初始祖以

軍功授潞州衛百戶高祖繼襲遂改隸興州
中屯衛云曾祖信祖勇河南湯陰縣主簿父
琮以公貴贈監察御史母宗氏贈太孺人公
生而英敏端慤不妄笑語爲兒時監察公問
之曰女志何如公曰我欲爲御史監察公竒
之乃遣就學爲弟子員正德庚午領順天鄉
薦丁丑登進士己卯除行人司行人時

武廟南巡公抗疏諫止左除國子學正居無何
今上御極詔復公官擢福建道監察御史公正
色直言彈劾弗少避其奉勅陝西清戎也刈
慝植良獎恬抑兢昭貞烈讞疑獄民用大悅
先是抽丁補伍輒復散亡公曰是貧所迫耳
迺察其殷富者使厚遣之貧者以私
餉者歲逾數千石公稽諸邊籍得其情俾悉
償焉自是軍伍用豐餉不悖出矣

上以公爲可用仍勅兼蒐軍實公以爲工居肆
則藝器而有節則費省迺奏于其寧諸鎮建
局除器而以時出納之時少師石琮楊公總

制邊務一日過陝講武病其器敝公令悉易之石淙公喜曰我軍固有恃哉乙酉還朝公攝四道事有囚當死托鄉人以千金賂之公叱之曰我知有法爾旣而知其萌自上疏明日遂辭疾弗出丙戌春陞今職督理三川屯離公至釐奸商之弊墾山谿之田結氓獠之心平廣安之寇時臬司諸公遷除弗至事多停委公咸暫攝之獄無滯囚案無留牘當道者嘉之薦諸天曹戊子蜀大饑廷議命藩臬一人賑濟皆曰非楊僉事不可公迺周歷郡縣區處咸宜凡數月力憊而疾竟弗起春秋四十有八距生之辰實成化壬寅七月七日也故乎公有致遠之才而弗克究其施有濟衆之仁而弗獲享其壽昊天弗弔咨痛何及惜哉公平生以不逮眷親爲恨每登第泣然涕泣事叔樂耕公情禮咸備兄泰歿鞠孤事寡逾于平日益其天性孝友如此然待人處已絕無驕吝爲詩文多奇思有西巡集十

卷配王氏封孺人宜慈惠和公多賴馬子四人長守正次守公守直守義孫男女二人其墓是年十月九日墓在良鄉縣舊店西三里祖塋之次銘曰奕奕楊宗肇自晉衍世濟其武公以文顯惟公之生履直秉貞始非諫官世以諫名繼登臺憲風裁凝肅孰謂埋輪豺狐斯伏秦山有華蜀江有岷溟澆截業允哉公仁仁胡弗壽我心孔疚弗於其躬必於其後壽匪在齡惟名惟德於萬斯年視此銘刻

監察御史華巖東公配孺人張氏墓志銘

御史東公于嘉靖十九年三月初二日卒其子旭卜以是年十月十二日啓公配窳孺人之兆與合墓迺叙公世行請余請銘余惟先大夫與公友善而余往來華州公燕語竟日自是最知公云按狀公諱郊字希宋別號華巖其先輩昌人也高祖諱良惠爲商州守元季兵亂死之良惠生驥自商從華遂爲華州人驥生昇商河縣丞昇生公父諱思忠成化

丙戌進士累官四川按察司副使配太恭人
薛氏生男子五人周義官魯兵部郎中漢長
蘆運使野刑部主事公其第四子也公生而
罕竒七歲解聲律十歲善舉子業正德庚午
舉于鄉辛未登進士授山西平陽府推官甫
下車謁巡按周御史以疑獄案牘數十篋試
之公讞允咸盡御史喜曰老吏也復以稷山
諸縣賦俾公平焉先是縣令平賦里胥因索
賄輒高下之公察其尤者若而人寘于法由
是夙弊剗剔賦稱均平矣是時晉府誣奪民
田爲牧馬地嘗格殺人公曰咎在嬖佞王實
不知迺檄諸當道卒繩以法民大稱便凡在
郡三年憲臣論薦者七丙子冬考績謁部選
授浙江道監察御史巡視南城豪猾歛跡時
錢寧怙寵納賄公據實論劾聞者吐舌戊寅
命巡通倉公首劾監督太監諸不法旣而條
陳急務曰厚國儲曰實軍餉曰輯群冗曰節
經費拔經證史曲中時艱有古人經國之風

詔甚嘉之

武廟將幸居庸公抗疏諫止事雖無濟而中外
愕愕知有東御史矣已卯按治南畿植善鏹
奸風裁尤著海寇黃熊嘯衆僭號撫臣方議
請討公陰令死士佯爲助叛覘熊夜醉擒之
餘醜悉平

武廟南巡江彬竊弄威柄玉帛子女索無虛日
公力勸沮之民賴以輯太監張陽等盜席百
艘謀鬻諸郡邑公曰卽以官鬻非奉

勅旨不可陽等謀格心實銜之會某守職著公
具疏論列彼與陽輩合謀大肆妻非遂左遷
潞州判官公累疏乞休乃獲以御史致仕云
居無何都運公亦自長蘆謝政時太恭人在
堂母子兄弟懌懌然甚歡也卜築少華山麓
竹樹蒼鬱池亭虛豁暇日與客逍遙吟咏其
間有華巖稿藏于家公輕財好施恤鄰睦族
壬辰歲侵嘗散粟數百石全活甚衆其它行
誼類此昔余每見公宇度軒昂論議慷慨雙

目炯然少年不及也竊念造物者雖靳施而
氣固神完期頤可至孰意遽奪若此距生于
成化庚子四月十五日壽六十有一初娶張
氏刑部侍郎尚綱之女早卒繼娶甯氏華陰
處士興之女柔靜莊一宜慈惠和俱以公貴
贈封爲孺人初太恭人遘疾甯孺人拮据相
之太恭人喜謂娶婦如孺人信生兒有益也
公夜誦讀孺人輒備飲食以資勤苦嘗聞權
倖有甘心于公者孺人慰解之曰君有令名
夫復何恨嗟乎古所謂女丈夫殆孺人類耶
距其生爲成化壬寅正月十六日卒于嘉靖
癸巳四月二十八日年五十有二孺人既塋
一年公再配齊氏男子六人旭甯出次龍齊
出次冕寬諷鳳側室出女子五人長適國子
生李麒次聘杜伯達餘幼孫男四墳圻坦均
孫女一墓在華麓祖塋之次銘曰維嶽降靈
維東鍾之冠簪累葉如龍如夢維公奮庸緝
其祖武惠遺其崇威驅豺虎命也不淑甘心

志錄 卷五
七
讒言信彼青蠅于棘于樊孺人繼作並善齊
德皎皎伯鸞伊孟之力吁嗟華麓兩封兩墳
于千萬年考視斯文

石泉師公配田氏墓志銘

嘉靖辛丑秋七月廿有九日石泉先生卒于
長安安定里第其猶子太學生表帥請予泣
曰叔父病時嘗以墓銘托君而今已矣惟執
事幸惠之以慰諸幽余與太學君結姻好知
公者莫余若也胡忍辭公諱夔字汝和姓師
氏世長安人也祖諱珍涉獵書史爲鄉里推
重父諱禮以鄉進士知澤州贈奉直大夫母
田氏封太宜人云公軀幹玉立雙目炯秀弘
治戊午舉鄉試壬戌登進士除授行人司行
人哈密忠順王請封公毅然獨往比還朝
拜吏科給事中年二十七矣正德初逆瑾勢
熾方灼公疏列釁狀瑾罵之曰師某鄉人敢
如是耶乃謫判景州尋罰粟五百石輸居庸
庚午瑾誅陞刑部四川司主事再陞員外郎

王仁者京衛指揮也以不孝論死公鞠之乃
得其繼母誣仁諸枉狀竟獲釋癸酉陞江西
按察司僉事公杜絕請謁獨特風裁嘗有勢
族干公公不爲在宸濠僭叛藩臬縲匿越信
宿濠嚴陳兵衛以復輿昇公至九江僞作牒
書煽惑郡邑公皆不知也公給守者項繫之
乃夜逸建昌與知縣方君聲義擊賊斬首七
十二人生擒林十一吳十三等二百七十八
再擒儀賓強文勝等二十餘人時都御史王
公守仁徵其諸路伏鉞吉州公令方君獻俘
實不自往王銜之而勢者又竒詆公遂文致
其罪宸濠敗公逮繫詔獄嘉靖戊子始獲寬
降戍馴象衛岑猛之亂王公再起經略召謂
公曰周顛被禍王道書躬吾悔負君矣乃檄
令西歸行經荊州公兄臯涓橋先生知郡事
時太宜人就養母子兄弟嘻嘻然甚歡也無
何抵家謁祠堂除丘壠屏居于常杜之間結
社醜飲酒翰擄詞意興有得輒掀髯長嘯人

鮮測識云公生于成化丁酉十一月十三日
壽六十有五配孺人田氏郡守濟之女性淑
慎遵內儀比公罹難孺人蓬首慕處夜則焚
香跪籲于天公南歸三月孺人捐館距生千
成化辛丑正月二十六日卒于嘉靖己丑六
月七日年四十有九女一人嫁刑部主事李
君應時側室李氏茲表等卜以是年十月十
八日啓孺人之墓與合塋復命弟模速銘遂
次而歸之墓在漢城南祖茔之次銘曰祿川
肆迎王維窘厄凝碧言懷禍緣以釋嗟嗟石
泉罹變孔迫不有膚功我心孰白漢城之陽
有坎者宅雙玉在斯徵此銘石

誥封恭人陳繼母高氏墓志銘

恭人高氏者封都察院左僉都御史雙溪先
生陳公某之繼配陝西巡撫右副都御史幼
溪某之繼母也隆慶壬申

今上御極

覃恩中外是時幼溪公爲僉都御史協院事恭

人以孺人再進今封云逾四年爲萬曆乙亥
上念關陝重地進公今官俾今拊循公拜

命感激圖惟報稱乃自京馳使報二親曰秋防
屆期兒當過徃比事告峻卽陳情乞

恩趨侍親闈公甫任兩月恭人訃至矣公擗踊
哀毀皇皇俟代逾數日收淚叙狀請余爲恭
人撰銘墓石余與雙溪先生同舉進士離五
十餘年先生高尚明農茂膺諸福恭人頃變
遽切悲痛茲余捧誦狀牘潸然涕焉安敢以

老病辭邪按狀恭人父諱椿母王氏閩縣人
也王父而上並以五經起家從父世魁舉進
士爲監察御史以直諫聞恭人性秉貞淑夙
閑姆訓嘉靖己亥隨父遊宦京師是時雙溪
先生以改官謁銓部元配趙恭人歿於家先
生聞恭人賢委禽逆焉先生補知隰州携恭
人如隰蓋至是先生凡四遷官矣先生益斤
斤操三事勁直不渝官舍蕭然門無私謁恭
人格繩趙武亦以廉佐之伺察局鑰言不踰

閩是故先生守官無內顧憂久之政成隰人
立祠祀焉辛丑先生轉思恩府別駕恭人如
思猶在隰也先是先生之官置於資斧恭人
盡卸簪珥以給副室乘間諷曰恭人相大人
廉大人喜甚然大人所嚮坎墮拓落廉固如
是邪恭人不荅操執若故居三年先生竟以
齟齬忤時解印綬歸先生既歸家徒壁立恭
人僕僕佐理督勸勿溪公積學竟底於成初
恭人歸陳勿溪公甫十齡恭人鞠育殆逾已
出比長受室於莊再封莊恭人乃莊恭人又
甚賢也恭人愛之教之勿溪公敏歷於外莊
恭人留子舍奉晨昏莊嘗遘疾恭人拮据視
之比莊歿兒女失恃恭人撫眄殆忘寢食故
勿溪公狀曰恭人視某如視所生視諸孫如
視其蓋紀實也先是勿溪公使按楚粵獲便
道謁恭人恭人每見喜動顏色日夕定省猶
諄諄煦煦爲孺子愛烹茗修澹輒不憚勞嗟
乎恭人可謂得母道矣恭人居無違言動惟

惜福敬共式於嫺戚惠和洽於媵侍幼溪公
嘗謂恭人備諸壽徵當與雙溪先生並躋期
願不虞其遽止此也距生於嘉靖壬午九月
廿五日卒于萬曆乙亥五月十二日春秋五
十有四子男五人長郟幼溪公次爽曾潛健
爽曾健皆恭人出潛庶室王出並弟子員爽
娶王氏曾娶鄭氏潛娶鄭氏健娶鄭氏孫男
七人長濬廩生長源長澂俱庠生幼溪出長
潮長浩長瀚爽出長塗健出幼溪公雄才博
學海宇具瞻頃如關中西戎孔棘公選將授
畧一鼓底定保釐剔蠹民用大悅

聖天子宵旰紆憂

蒞頌

卹渥二母有知榮感無極矣君子是以知公之
孝也茲將以 年 月 日葬恭人於趙母
之右用賓勉撰銘辭示後世焉銘曰高陽降
宗赫於陶唐衍爲閩閩既繁且昌其昌伊何
大節昭明叶化洽閩閩休有烈光於爍恭人

濟美繩芳相夫訓子允矣邦良

封章游錫

卹典斯皇食報匪浮勗我紀綱長樂之原抱震
負坎下妥慈淑銘刻琬琰百世有徵合聞弗

忝

承直郎鎮江府通判鮑陂黃公配魏氏墓

志銘

嘉靖甲申春正月二日鮑陂黃公卒於深水
官署越十有八年庚子十月七日公配魏孺
人又卒其子鄉進士宸卜以壬寅冬十月二
十有六日啓公之墓與合葬乃自述世行請
史氏用賓爲撰志銘志曰公諱鏗字文宣別
號鮑陂世咸寧人也曾大父文杰舉洪武鄉
試知山西寧鄉縣事文杰生壽宗教授永興
王府宗生如籥娶梁氏以成化己亥九月一
日生公少失怙諸兄擅財析爨公四壁立或
嗾之訟公遜謝之曰病未能也比遊黌舍爲
督學公器重正德庚午舉鄉試兩舉進士不

第丁丑署山東掖縣教事掖人鮮賓薦公分
經授徒嚴立科條寒暑靡間也蓋自是登第
者四人癸未陞直隸鎮江府通判先是沙北
川南旱潦爲患公檄諸當道自京口開渠以
資灌溉沿玉山築堤以障河流民大稱便時
歲大侵道殣相望公煮粥給糲憂形於色未
幾郡中感化凡出粟壅殍者若而人都御史
御史嘉之俾攝漂水事漂巖邑也俗黠政蠹
公擒諸奸吏而振剔之凡在漂兩月治化大
成卒之日吏民悲悼多泣下者年四十有六
爾孺人者長安處士玄之女天性靜專女紅
精絕其事公也有鷄鳴之風焉初孺人歸姑
氏垂白矣孺人躬執井臼迄無惰容佐祀禮
賓式合理道雖族黨無不悅孺人者公既歿
漂孺人拏視西歸履不踰閭言不踰闈教子
訓婦凜如內師殆古所謂女丈夫者邪壽五
十有三弘治戊申八月十七日其誕辰也生
子凡六人男四長袞次即宸娶唐氏次表府

學生取劉氏次裳衮衮蚤卒女二長聘國子
生王用卿次適儒士王大觀亦卒孫男二道
明道光宸表端潤好學行躋膺仕天之報公
夫婦固在是矣用賓厚通家稔聞休烈遂大
書貞珉以詔後人墓在鴻固原祖塋之次銘
曰矯矯黃公抗志獨立利別盤錯惠留郡邑
魏也相之執德不移栢舟飭義熊丸闡慈二
子英英如圭如璧鳳紵龍章儲降俟錫於茲
墓門連理同根我銘不湮爾名則存

都察院右都御史兼兵部左侍郎太華何
公配淑人李氏墓志銘

明興當成化弘治間太和融液化理熙洽海
內名人於斯爲盛若太華先生何公其一也
公諱棟字伯直號太華其先直隸巢縣人高
祖德才元末避亂關中占籍長安遂世爲縣
人馬曾祖義隱德弗耀祖寬文真皆以公貴
贈通議大夫兵部左侍郎兼都察院右僉都
御史祖母姜氏母左氏俱贈淑人云初左淑

人將就蓍夢神降自空捧一緋袍貴人授之
遂誕生公公生而岐嶷讀書一覽輒悟比爲
學官弟子督學朱凌谿先生以國士待之正
德癸酉鄉試二名辛巳登進士選授河南道
監察御史公正色獨立坐失朝儀調直隸宜
興知縣公體恤民隱釐正士習築便橋修學
舍邑有巨俠戮戮其土公首寘于法士庶感
悅嘉靖癸未丁通議公憂邑民留鳥肖像祀
之丙戌大學士遂庵楊公疏薦陞順天府通
判戊子

上命修通惠河進陞工部都水司郎中公疏鑿
故道蓄潴上流建閘築堤務圖久遠甫五月
而告成自是糧運直抵大通橋歲省輓費十
二萬緡

上心嘉悅陞俸一級 賜白金綵幣尋陞通政
使司右通政仍督河務辛卯京師恭建四郊
臨清陶甃官軍疲於轉運公疏請經過漕舟
不論公私量爲附載上下便之是歲陞太僕

寺卿奉使河南 冊封周府壬辰九月轉都
察院左僉都御史巡撫大同是時彗星出於
井之末度 朝議洶洶以爲大學士某輔政
之應公考索象緯玩繹圖經上疏略曰井之
末度大同分野彗色蒼赤兆主兵變期年之
後大同當有圍城蹶將之災聞者嘖嘖誣爲
黨附公至鎮申嚴紀律拊循營伍虜入高山
站選將厲兵俘四十九級邊境肅然無何臺
臣仍以星疏論公左遷四川布政司左叅議
公去三月大同軍亂據城肆逆果如公言人
始服先見云公終養家居十有八年庚戌八
月虜犯畿輔

上赫然震怒思靖邊圉大學士華亭徐公時爲
大宗伯具疏薦公

上召公爲右副都御史開府薊州提督軍務公
感激遭逢遍歷關險自山海抵居庸延袤二
千餘里修築邊防分爲十區計區戍兵計兵
設將遠近衝緩各相聯屬一遇警報互相策

應復恐兵分勢寡各設遊兵列營應援因疏
安攘六事

上悉允行自是醜虜震懾疆場寧謐矣辛亥

上進公兵部右侍郎兼右僉都御史總督薊遼
保定軍務咸寧侯仇鸞驕橫貪功請伐彘顏
福餘泰寧三衛

上降勅令公會剿公抗疏諫止藉崇待罪謂三
衛爲我藩籬世修職貢庚戌之變實逆酋
陳通事哈丹兒爲之嚮導乃若因茲小醜大
開邊隙是自徹藩籬增勅敵如 社稷陵寢
何

上若曰侍郎言是伐衛事竟寢頃之公密遣將
士指授方略擒嚮導二酋以獻

上進公左侍郎廕一子錦衣衛正千戶壬子擒
黠虜孫黑子等

上賜白金文綺廕一子冠帶總旗兵部第其功
狀乃於正千戶加廕二級

命公冢孫承勛爲錦衣衛指揮同知公歷督府

三年計修邊牆三萬八千丈計獲俘虜三百三十級甲寅考績

上進公右都御史兼兵部左侍郎廕子瑛爲國子生公尋上疏乞休

上賜俞允後四年丁巳侍郎吳某因臺臣論列辭疏及公奉旨閑住隆慶戊辰大宰楊公以撫臣疏請奉詔具題致仕進公階資德大夫

今上御極公年躋八十三矣有司奉詔問勞儀幣優縟公望闕稽首感極泣下秦王雅重禮公親臨問焉越明年爲萬曆癸酉五月十一日公以疾不起距其生爲弘治庚戌九月朔六日壽八十有四公博綜群籍篤耆數學商推古今如指掌上臨機應變笑無遺策議者嘗欲起公總持國計不果識者惜之所著有督府奏議詩文各若干卷配李氏封恭人再封淑人同邑處士倫女母張以弘治辛亥七月初十日生結髮事公克敬克儉事通

議公左淑人以孝謹聞公中外敷歷淑人家
居整肅內外有葛覃采蘋之風焉弟梁蚤卒
遺女禛祿公與淑人鞠育備至嫁都指揮白
椿淑人先公十六年卒是爲嘉靖戊午二月
十七日壽六十有八側室沈氏侯氏子二長
琦李淑人出卒以承勛貴贈懷遠將軍錦衣
衛指揮同知娶龐氏裕州同知修庵君女封
太淑人次卽瑛侯出娶劉氏戶部尚書西陂
公女孫男四長卽承勛麗淑人出娶段氏封
淑人翰林檢討河濱先生孫也次福哥壽哥
慶哥瑛出曾孫男一道寧曾孫女四承勛出
俱幼茲承勛等將奉公暨淑人合塋乃持前
進士韓別駕狀詣余請撰墓石余與韓君辱
公門人勉志其略如此其塋爲萬曆甲戌閏
十二月十五日墓在木塔里通議公學次銘
曰繫昔有周玃旒孔棘顯允方叔壯猷允塞
陳師鞠旅以匡厥國赫赫南仲城彼朔方設
旒建旄王事于襄我明中興驕胡肆侮

宸怒赫然 召公開府推轂授鉞肅我疆土公
拜稽首

天子萬年耀武臨戎矢周並傳人亦有言惟皇
佑德藩夷既全公德靡極宜子若孫光昭

帝錫卹典如雲侯降自天彰我王度慰爾重泉
百世考賢斯銘在鐫

工部都水司員外郎槐陂馮公墓志銘

嘉靖丙辰十一月十有七日槐陂馮公卒再
逾年戊午公子顯卜以是年十二月二十有

九日葬公於鮑陂里新兆乃序狀詣余請銘

墓石余與公交好四十年顯妻余長女知公

莫余若也惡可辭公諱應元字體乾號槐陂

世咸寧人也高祖珍生玉玉生喜喜生賓號

質庵娶尚邑李氏以弘治丙辰十月二十四

日生公性端雅不逐鄰兒嬉戲長爲學官弟

子潛心藝業攻苦食淡時漁石唐公東谷教

公相繼督學每試其文奇焉嘉靖戊子舉於

鄉己丑卒素太學壬辰登進士授山西稷山

縣知縣稷號難治公下車敦節義抑豪右均
徭役課耕織先是廟學傾圮教章寢弛公規
畫增拓煥焉式備遴選諸生日與誦說先王
習用丕變邑多盜賊晝肆剽掠公緝渠首若
而人寘於法境內肅然值歲大旱公齋沐禱
雨輒大澍歲大熟當道者嘉之累疏論薦戊
戌陞直隸順德府同知公至攝府事值
今上幸承天吏民震恐公殫竭心力構飭

行宮輿馬井井周備

駐蹕經宿內外帖然

上建輦華城部以公才檄令佐役是時順德當
徵銀萬兩以助工費公狀列民瘼請於當道
是公議竟奏移它府庚子陞工部都水司員
外卽以王親例格改同知登州府職專清戎
公鈎索逃亡易置老稚凡清解者幾千人登
瀕於海公暇輒縱觀葵舒吟嘯海有幻景傳
云海市公齋禱請見期以三日及期市果見
諸若城郭若樓臺若山巒草木參差翁鬱隱

顯萬狀公喜曰蘇長公詩紀信有徵也是時
太守沉湎於酒察案讌飲扃戶達曙太守每
召公輒以疾辭太守銜之肆爲奇詆會入覲
考察太守竟斥去時有私太守者謂太宰曰
太守罷貳守可獨留邪太宰難之陞公韓府
長史是時余爲禮侍撫臺端公廷赦入爲少
司徒問謂余曰馮登州方廉嫉惡已甚其愛
之重之頃嘗薦引俾勵庶寮茲拜王門謂非
倒置可邪公既西歸適母李夫人七袞公喜
動顏色有觴累日母促赴任公跪請曰長史
與別駕孰優母曰別駕優也公曰兒不能媚
長以取通顯可能事主人邪辭竟不赴無何
買田十廛構屋數椽歲值農時公與其配盧
孺人躬事耕獲有古人風越十有三年遭疾
不起壽六十有一公古貌修髯洞達攝生養
性之秘余嘗覘公澹泊無欲期頤可至也乃
竟止此嗟嗟悲乎天曷常哉公孝友天至父
喪守禮三年不入寢室歷官俸餘悉以奉母

一縑不私也視弟應奎應登情好怡怡其教
于睦族交友卹鄰顛若此晚歲尤好學手不
釋卷所著有耕餘錄存省錄詩演職於家配
盧孺人同邑右族公與相敬如賓生子三人
男一卽顯舉己酉鄉試女二長適憲副閻公
子枰次適叅政曹公子才俱縣學生孫男一
延慶余女出頭學行修潔足繼公志君子謂
馮氏之興未艾也乃爲之銘銘曰爰有鳳鳥
文彩翹奕翱翔于天胡鑿其翮繫彼寶劍華
耀秋蓮倏焉閔澁光射斗躔矯矯馮公抗時
若此施弗我究亦既有子鮑陂之原龍從者
旣百世考賢貞珉眎鐫

昭勇將軍都指揮僉事渭西朱先生配贈
淑人蕭氏繼封淑人張氏墓志銘

嘉靖二十八年己酉夏六月六日渭西先生
朱公卒先是用賓病瘧先生在視之語言覲
縷意彌縷縷用賓喜且疑未幾先生病矣嗚
呼孰知視賓爲訣別邪悲哉先生諱相字公

輔別號渭西江西新塗縣人高祖銘從

成祖皇帝靖難有功陞金吾左衛後所百戶官
德初調陝西西安前衛前所遂世隸西安云
祖武真父啓俱以先生貴贈昭勇將軍都指
揮僉事祖母柳氏生母葉氏贈淑人嫡母丁
氏封太淑人先生脩幹玉立風骨秀朗甫成
童受易于戶部尚書近山劉先生弱冠爲學
官弟子員歲試當食廡尙舍王生名殿先生
先生憫其貧讓之每大比就試輒不利正德
己卯先生逾四十矣是時昭勇公謝政幾廿
載以世蔭久曠先生應武舉鄉試中式明年
庚辰襲百戶嘉靖乙酉少師邃庵楊公節制
諸邊甫入關見先生喜曰吾固知爾貴乃效
班定遠投筆邪益邃庵公嘗督學關中先生
迺所取士云丁亥虜寇延寧先生赴
關獻功

上命大官宴勞賜緋衣一襲寶鏹千緡陞副千
戶庚寅冬沙河墩與虜戰先生斬首二級陞

正千戶甲午虜寇韭萊灣先生斬首一級陞
指揮僉事己酉復以沙河墩之捷覈實告竣
進都指揮僉事給

誥命授昭勇將軍是時都御史西溪任公御史
池南唐君疏先生文事武略堪元戎之寄庚
子奉

勅京州顧班筴鄂

勅守岷州先生所至整軍實葺城隍謹斥堠勤
訓練其苦與士卒同恙胡畏懾莫敢犯者先
是守備謁臬臺戎服自翼門入跪先生至岷
吏白故事先生曰吾嘗與臬臺共事乃今行
屬官禮邪卒衣錦按轡由中道入臬臺衙之
拒弗與見居數月先生謝病遂歸是歲秋虜
數萬騎自乾溝入薄原州巡撫洪洋趙公懼
問先生先生曰原州明公所守宜過赴爾洪
洋公即偕先生抵邠虜勢愈熾或有沮還師
者先生曰明公茲行黔黎共恃還則解體矣
迺益振軍容先生當前鋒虜聞大軍來果宵

遁洪洋公大悅益重先生先生蚤歲攻苦嗜
學晚熟孫吳兵法深沉有謀臨事能斷每論
古今成敗輿圖險易歷歷如指諸掌冰蘖之
操終始不渝使獲捷將相其樹立當下上古
人不究所施非數竒然邪元配蕭氏千戶政
女蚤卒贈淑人繼張氏指揮畢女封淑人宣
慈惠和佐先生虔謹罔懈相敬如賓淑人無
子側室段薛亦無子先生以同母弟倫之子
衣爲嗣早卒衣子宗周先生鞠育成立聘寧
陵知縣費君孫女諸姪仕永官民皆爲受室
植業不異所生其友弟卹姊睦族和鄰惟日
不足也先生生于成化丁酉正月七日壽七
十有四張生于成化庚子正月八日卒于嘉
靖壬寅八月廿四日壽六十有三初淑人沒
先生命用賓撰志以繼嗣不定中止茲宗周
偕仕等卜以是年十月十有九日奉先生暨
蕭淑人合塋于張淑人之壙用賓叨厠門下
幾四十年知先生者莫用賓若也乃投淚志

而銘之墓在城南八里屯祖塋之次銘曰豫
章毓靈維朱肇衍自燕祖秦爾毅靡戢誕發
先生抗志居貞文以植身武以逃名穢祝孔
棘我心用惻飭乃戈矛以匡厥國

帝曰吁哉 命錫自天之藩之屏維藉爾賢人
亦有言河清難俟直不我容眷言桑梓桑梓
悠悠曰十經秋種瓜青門允嗣前脩李廣不
候鄧攸無子豈曰宜然維數所使嗟嗟先生
寔與之同銘辭在鑄昭跡無窮

封太恭人馮母鄭氏合葬墓志銘

太恭人鄭氏者

贈中憲大夫陝西按察司副使馮公諱紹之繼
配巡撫延綏都察院右副都御史澤山公舜
渙之母也隆慶丁卯

穆皇帝御極

覃恩邊臣是時澤山公飭兵上郡中憲公暨太
恭人由主事太安人再進今封云萬曆癸酉
澤山公謝政家居每值令辰輒開筵率子姓

爲太恭人壽越三年乙亥太恭人遘疾公籲
天嘗藥衣不解帶竟以五月廿九日棄養公
擗踊哀毀幾于滅性居三月始圖襄事乃述
太恭人世行遣從弟庠生舜相詣前史用賓
撰銘墓石公馭歷關陝太恭人迎養官舍是
故澤山公之孝太恭人之賢余所稔聞胡可
以老病辭狀曰太恭人鄭氏蒲州人也父諱
質母張氏生育異質夙閑姆訓是時中憲公
配王孺人沒父文林公慎爲擇配聞太恭人
賢令委禽焉遂歸太恭人奉事舅姑勤敬自
將滄漣澣浣必先諸婦舅姑大悅謂兒婦得
人矣時王孺人生子歷山君甫七歲太恭人
鞠育殆逾已出比長授室於王嘉靖癸未子
濂偕澤山先後誕生無何王沒太恭人並乳
二子煦煦盼撫日夜勞憊家人請爲濂擇乳
太恭人泣曰吾固爲樂弗勞也比二子漸長
出入相似見者驚爲孿生中憲公分教鳳陽
弟繼居蒲是時文林公夫婦已不逮養太恭

人佐奉行主肅潔蒸嘗迎繼抵鳳翕翕然甚歡也公性恢達喜賓客即寮友過從太恭人躬治厨饌精巧絕人客每持歸以爲中饋者式歷山君凡五娶妻家故貧甚太恭人悉爲經理盡脫簪珥以給諸費故歷山君感勵何學竟底于成事太恭人如所生云太恭人高朗端恪行合理道見習俗婦女奉釋氏者輒鄙其愚嘗曰篤厚人倫是資冥福何爲禮士木邪故于內外媼族既恭且睦卹下有常周貧不厭家人有過輒加譴責閭政肅然有古女丈夫風余撫狀嘆曰太恭人之道如此宜乎中憲公澤山兄弟之有今日也昔史稱楊誠齋父子清介絕俗得諸天性夫人羅氏裨益良多乃今觀於太恭人益信太恭人生于弘治戊午十一月初三日壽七十有八子男二長舜田歷山別號臨兆府同知初娶于王繼王季薛翟次即澤山娶趙封安人再封恭人繼賈女三長適引禮舍人張繼次適知州

范君子好古次適大司馬南澗楊公子凡孫
男四長濂把總指揮娶武強尹張君女繼范
繼楊次洛舉人娶鎮撫楊君女歷山出淪舉
人娶太宰虞坡楊公女津聘延安推官楊君
女澤山出孫女三庠生劉衍被楊遇時僉憲
西川張君子近光其壻也曾孫男七嗣科庠
生惟度惟康惟膺濂出惟慶娶太僕卿一泉
孫君孫女惟賡聘薛氏洛出惟榮淪出曾孫
女二一適庠生景憲一字刑部尚書鑑川王
公孫之桂馮氏子孫日益昌熾而蒲之言賢
母備純嘏者咸歸諸太恭人矣茲澤山下以
次年三月廿七日啓程胡庄中憲公之壻合
而葬焉舜相復來乃爲之銘銘曰內教寢微
繼母鮮慈繫太恭人世德作儀我子我孫我
撫我怡人亦有言胡獲弗苗赫赫中丞
天子是毗 寵誥斯皇象眼孔宜繫太恭人天
寔報之程胡有封塋塋雙壁不騫不崩萬年
光宅

韓府左長史芝田陳君墓志銘

嘉靖丁酉四月十八日 韓府左長史芝田
陳君卒于官署先是寧遠王不法君勵色匡
正王怒率無賴少年數十輩詬詈之君忿恚
危坐辭氣嶽嶽忽手散直視而死 韓王聞
之慟悼爲治棺殮令人護柩還長安其子縣
學生在額訴于 朝

上命巡按御史鞫之無賴編茂者若而人遠近
慶慰以爲陳君有子云越二年戊戌在將以
十一月廿有六日葬君于城西講武里以余
昔同君舉于鄉且相善也乃叙狀請銘墓石
按狀君諱德字大本別號芝田其先爲浙江
青田縣人高祖孟仁任錦衣衛百戶曾祖公
興將嗣職改除 未與王府典仗陳氏居長
安自此始祖英父森母馬氏以成化庚子九
月初七日生君君穎悟絕人博通經史爲學
官弟子員已有時譽都御史內江蕭公布政
使莆田方公主公一見其文嘆曰才人才人

各遣其子弟受學焉正德己卯舉鄉試第二
名嘉靖丙戌會試下第選授山西汾州學正
君嚴而以禮勤而有規故事凡弟子員初謁
食廩咸有餽遺名束脩禮君一切不受汾素
多才自君作教始有進士及第者矣凡在汾
四年當道疏薦者五庚寅陞國子監博士君
在國學作人與汾州等處已奏績著最

勅進階爲修職郎大司成函谷許公方齋林公
極器重君累薦諸天曹以備臺諫時

天子用廷臣議 新王輔臣令選經明行修者
會 韓府缺左長史天官曰韓族繁多驚欲
導服之非陳博士不可乃竟用君君至韓申
明

祖訓講論法制宗室有過惡一一奏聞故宗室
多有怨君者初 韓王爲世子將飲諸王于
郊外君力諫不從乃索諸監門管鑰而藏之
及期世子諸王至門門弗得開是日竟罷飲
世子怒甚既而悔曰微長史吾幾有過矣遠

近聞之無不賢世子而多君者君事親孝敬
尤謹喪祭好學之心始終如一凡陰陽醫卜
農圃諸書靡不精曉然疾惡太嚴卒致禍云
春秋五十有八配柳氏生丈夫子三長即在
娶李氏次陞娶丁氏次堅聘甘氏女一孫男
女凡三人然在等皆好學能自樹立君子謂
芝田君瞑目矣銘曰陳宗顯瑄派衍莫京由
越徂秦於赫厥聲惟君聿興文以紹武蔚蔚
掌固肅肅藩輔賈傅懷傷竟以喪躬豈不貪
生畏彼道窮吁嗟陳君實嗣厥履百世有徵
我銘齒齒

山西高平縣主簿東川張公暨配孺人李
氏合葬墓志銘

官保氏曰宣德正統間關中以名氏著聞者
曰張克讓云克讓長安縣人也世敦孝謹克
讓公累賞鉅萬樂善喜施子姓千指同財共
爨鄉人至今傾慕不直以貲云克讓公生英
號毅軒毅軒公生三子長淮號海濱次和號

節庵次穉號養素皆以宿德脩齡 詔爲壽
官節庵公生錠字宗獻號東川東川公於隆
慶三年己巳五月十七日卒壽八十有四子
橋哀毀匍匐克克如有窮也既逾月卜葬先
塋乃揮涕叙狀請余請曰先君砥礪名行欲
垂不朽然又雅好文辭願乞執事銘墓以慰
地下賓母累贈夫人爲養素公女東川公於
賓外舅也前歲賓謝政歸日侍杖屨乃今遽
捐館舍追念音容涕下交頤忍執筆銘邪悲
夫狀曰節庵公元配姓賈氏兵部侍郎渭川
先生勵之孫也以成化丙午九月十九日生
東川公幼岐嶷節庵公授以朱氏小學卽能
頷悟長習舉子業是時建安滕太史先生邃
於經學乃遵例爲國子生就學焉居三年盡
受其業滕先生喜曰子於科第唾手可取也
乃累試於有司弗售嘉靖丙午公年幾六十
矣是時賓爲春坊諭德勸謁銓曹授山西高
平縣主簿高平鉅邑前簿咸以墨去公恪守

官常而以敏濟之自是聽訟催科上下稱平
氓庶無敢欺者是時廣川楊海洲爲縣君於
諸寮案獨敬禮公曰長者長者云丁未秋當
詣塞上公以冒寒爲歎遂解職歸歸之日百
姓攀號爭爲祖道少司寇一泉大司成泉南
郭公兄弟咸歌詩以紀之公既抵家拓地於
居室之後構亭築圃扁曰長春抱甕澆花開
徑種竹時與故老結社飲宴客退無事則焚
香鼓琴或檢抄醫方然運筆端潤取法晉人
操音中和在昔名家不是過也先是鄉飲酒
禮郡守請充三賓然一再往竟辭不赴爲太
學生今太宰虞坡楊公知長安大書孝友製
扁爲贈方岳少洲馮公數禮顧焉其爲縉紳
所重如此公敦尚倫理屏黜紛華伯叔父袁
海淮揚躬往省視節庵公歿事繼母鄧夫人
曲盡甘旨鄧夫人生鑛號西川賢而知學交
相友愛張氏世德于是乎益振矣配孺人李
氏咸寧處士讓之女姿女性端婉女紅絕倫年

十七而歸東川公維時舅姑性嚴喜怒不形於色孺人夙夜勤敬恪遵矩度佐祀脩膳親爲烹飪益四十年無惰容舅姑既沒益肅閭政東川公獲免於內顧者大抵孺人相助之力也孺人生子一卽橋國子生性至孝孺人多病憂鬱因嗜釋典橋日誦釋典以爲娛少間會養素公曾孫齊爲戶科左給事中獨立敢言逮繫 詔獄橋驚怖往視孺人竟以疾不起自是東川公暨橋妻王氏相繼云亡初東川公生額有大痣色如渥丹雙眉若若寸許比老益矯健相者謂東川公壽當期願由今觀之豈相者茫昧不可信邪抑天數有定不可必邪古所謂齊德並壽殆公夫婦之謂矣孺人生弘治己酉十二月二十六日卒於隆慶戊辰九月九日壽八十有二女二長適高縣主簿師表生子道立舉戊辰進士次適士人王依霄孫男一崇德女一王垣其壻也逾三年壬申冬十一月二日橋奉東川公孺

人合而葬焉復來促銘實爲志之如此銘曰
吁嗟榱桷大厦是宜胡售弗遇斲而小之吁
嗟鳳鸞文章五色胡室於荆乃棲枳棘舅氏
英英豈曰是儔天寔爲之人也何尤孺人于
歸琴瑟靜好而熾而昌永錫借老其老伊何
履善敦仁長發其祥佑啓後人漢城之東有
封者宅藏斯妥斯永昭銘石

重刻三渠先生集卷之十三

卷之十三

松山劉公合葬墓志銘

正德中余祖贈御史府君與同里諸老約爲
讌會冠裳肅楚殺菽芬絜有先民遺風維時
松山劉公與會號爲淳慤而公之兄近山先
生因命其會曰歸義云是時余爲童子先祖
嘗令行酒自是識公公子鄉進士秉正爲余
知已家聲世德聞見頗詳故公之歿秉正以
志銘請余不獲辭按少卿劉公序狀曰公諱

瑀字用節別號松山世咸寧人也其先爲山
西平陽人曾祖敏中隱德弗耀祖懋父鑑皆
以近山公貴贈資政大夫戶部尚書祖母任
氏母李氏贈夫人公少以鬻繒爲業李夫人
極備甘旨近山公由曲沃令遷戶部主事猶
歲供數十金以助其費既而遇例授散官遂
罷其業日與親故往來城隍官府近山公三
歷郡守公未嘗至任及登司徒始如京一省
無何卽歸行李蕭然人不知爲尚書弟也時
巡撫崔公欲爲增治居第御史張公亦厚贈
公皆固辭不受近山公謝戶部歸家政一遵
禮公敬承之其事近山公若嚴父每值令辰
則躬率子弟羅拜庭下近山公爲之改容人
謂二難云公無它腸無遽色早年遭疾終身
誓不肉食飲酒必醉醉卽攜諸孫嬉咲爲樂
或以事相屬則握手拒之曰不敢累吾兄也
王子曰余觀于松山公而知近山先生完名
之有自也語曰王不在櫝或將毀焉錦不在

筭或將汙焉言佑之者難也當先生爲尚書
時松山公若不抑損侵牟齊民廣田園積金
帛雖先生守義苦節人將瑕類之矣余故曰
觀於松山公而知近山先生完名之有自也
公初配韓氏同邑處士釗之女母李氏于成
化戊子八月初五日實生孺人柔靜莊懿年
十七歸公事姑處嫂惟孝惟和先公二十一
年卒時正德乙亥四月廿七日也年四十有
八繼同邑孫氏婦道母儀克嗣前徽先公五
年卒公生于天順辛巳十二月十九日卒于
嘉靖丁酉四月初七日壽七十有八孫生于
成化戊子七月二十日卒於嘉靖壬辰十一
月十三日壽六十有四側室張氏男子三長
即秉正取邢氏次牛氏段氏次秉端靖江縣
簿取李氏繼方氏次秉義引禮舍人取趙氏
繼吳氏女二長適李鵬次適魏以觀孫男十
尚賁尚孚尚咸尚蒙尚漸尚謙尚有尚隨尚
臨尚濟孫女七士人張汝英舉人張訓生員

趙洛儒士馬質其婿也餘未聘曾孫男三三
長三願三益曾孫女一先是韓孺人歿塋韋
曲祖塋之次茲秉正將奉公啓其壙并孫孺
人合而窆焉實嘉靖辛丑二月廿七日也爲
之銘曰帝曲之原有封如壘其內維何曰隱
君子履滿不驕居有不侈雙玉載藏美婉連
理百世有徵銘石齒齒

都轉鹽運司知事封中憲大夫鳳陽府知
府引渠盧公配贈恭人劉氏墓志銘

封中憲大夫鳳陽府知府盧公者山東按察
司副使鑑之父也嘉靖壬戌按察君爲副使
飭兵徐州無何以重望風裁改駐密雲癸亥
冬大虜犯畿輔按察君蒙大難謫戍雲中越
四歲戊辰爲

今上御極之二年

上用臺臣議復按察君官公方慰釋復疾作不
起實爲七月十有五日壽七十按察君哀毀
踰節幾欲滅生明年己巳卜塋惟吉乃收淚

叙狀請余銘墓余先妻累贈夫人爲公從女
又少女爲按察君家子洲妻兩世姻連知公
莫余若者何可辭按狀公諱維字汝張爲漢
封良鄉伯植之後十一世祖謹自涿鹿避地
遷河東四世祖文質自河東如關占籍咸寧
遂世爲縣人焉文質鬻繒爲業貲雄關輔今
關輔言著姓者必曰盧綾兒家文質生茂茂
生祐取同邑孫氏以弘治己未二月十三日
生公少卓犖從前大司馬西陂劉公習舉子
業長失怙恃遂入貲爲臬司知印嘉靖己丑
謁選天曹授山西同戈驛驛丞癸巳陞四川
青川守禦千戶所吏目青川在巴西山菁中
地險俗陋人鮮知學武備廢弛經過者爲患
公檄諸當路葺孔廟結屯兵建庠廩以廣儲
蓄伐山木以通道路蒞任九年累擒巨寇王
三等自是盜賊屏息商販踵至漸爲繁會之
區輿情感悅建遺愛亭於公署云甲辰赴部
考績陞兩湖都轉鹽運司知事至是宦情寥

落故鄉之思切矣會按察君登進士第遂解
職歸公旣抵家日與友朋結社醜會築圃西
郊種樹執蔬引通濟渠水溉之因號引渠太
守濟南洪公雅敬重公躬率禮官請充鄉飲
三賓之選乃一再徃竟辭不赴其簡靜類如
此公敦孝友喜施予軀幹魁梧雙目炯炯然
有子亢宗爲時聞人躬荷 綸褒飲食衍衍
可謂備享五福者矣余讀易至積善有慶之
說未嘗不嘆天之施報善人若符契合者正
統癸亥關中大祲文質公輸粟至二千石

天子嘉之

賜璽書羊酒勞焉乃今馴至於公家世駸駸然
益光顯矣語曰積水成淵蛟龍生焉積土成
山寶藏興焉殆盧氏之謂哉公元配贈恭人
劉氏山西按察司僉事琛之女也母郭氏以
弘治辛酉四月十四日生性貞慧嗜女紅僉
事公慎爲擇配是時公方嚮學僉事公悅之
令委禽焉遂歸恭人格修內政佐公樹立有

鷄鳴之風生按察君甫十年而不祿矣是爲
嘉靖戊子二月六日年才二十有九恭人臨
歿撫按察君謂公曰善教我兒令效吾父蚤
取甲第殮惟布素毋用金珠文綺嗟哉悲乎
非達人能至是邪恭人卒一年公再娶長安
楊公柰女期年而歿復娶今封恭人葛氏乃
七品散官江女也副室郭氏生子凡九人男
五長卽按察君娶山東按察司僉事桑公綦
女封恭人次鏞娶指揮僉事岳江女次鍾娶
巡檢張景女次鈿娶元翰林學士同公裔孫
希臯女次鐸娶監察御史王公孫世高女女
四長適舉人黃策次選配秦藩中尉懷燧封
宜人次適府同知沈公子庠生松次適指揮
同知殷誥自鏐以下葛恭人出鍾爲郭出孫
男十人洲淵洋津桑恭人出澶澶爲岳出廷
爲張出涪涑汴爲同出孫女三一選聘中尉
誼津洲爲學官弟子聘知州劉公禋女者淵
也按察君卜吉於隆慶二年十月十五日啓

恭人之窳合而葬焉余以蕪陋勉爲叙述如
此墓在城南木塔里祖塋之次銘曰盧宗奕
奕誕發良鄉遷於河東旣繁且昌河東徂秦
曰四世祖煌煌

帝錫耀我闡輔考祥於公有官有封惟彼鳳毛
霄漢奮庸温温恭人胡福爽德玉殞珠沉未
爲公剗渠水湯湯厥流惟長達於河海接彼
銀潢猗與引渠令聞不已百世有徵鑒此渠
水

戶部山西司郎中兩溪孫君墓志銘

嘉靖辛丑六月十有九日戶部山西司郎中
孫君卒于京邸其子光庭扶柩西歸卜以壬
寅十月四日葬君于王家溝祖塋之次乃叙
狀請余爲撰墓石志曰君諱巨鯨字子魚號
兩溪其先朝邑人也大父堅僑居徽州遂爲
徽人焉父珂以君貴封奉政大夫戶部郎中
母趙氏封太宜人云君將誕奉政公夢蛟龍
入室長受胡傳春秋正德己卯舉于鄉癸未

登進士知山西洪洞縣洪洞繁劇君剔蠹弊
勤撫字禁苞苴平稅役人不敢干以私邑有
潤源湮廢百年君督勸疏濬之一載告成凡
溉田三萬餘畝士民感悅立碑頌績憲臣交
章論薦不報丙戌迹職吏部以萋斐調蜀之
南川甫下車夢二僮髮視哀于庭下君讞諸
圜犴得生濟者二人丁亥大侵蜀民就食南
川君捐俸鬻粥全活甚衆會直播賊某作亂
蔓滋南川君督兵勦捕獲某等凡若而人賊
遂逸去戊子攝知華陽無何南川賊復起父
老詣撫臺懇留者數百人賊聞公來乃復逸
去蓋自是邑人愛君如父母矣辛卯陞知開
州諸所規畫一如在邑乃禮敬名儒纂輯郡
志越三載而政成乙未陞戶部浙江司員外
郎廣寧之變督餉乏人少宰兀厓霍公遴選
得君陞山東司郎中往焉太監王其牟利撓
法君欲按舉之王乃遜謝丁酉丁太宜人憂
庚子赴部補山西司竟以勞悴不起距生于

弘治甲寅三月廿五日年四十有八君宇度
軒昂論議慷慨事親友弟殆出天性余竊念
年力如君通顯可致孰意造物遽奪如此初
娶鄧氏贈宜人繼娶閻氏封宜人閻生子凡
八人男四長卽光庭州學生次光慶次光麗
次光序女一許聘彰德守賈君士元之子孫
男一曰文思有兩溪文稿藏于家銘曰宓子
崇化名以永聞西門豹治鄴功以不湮吁嗟
兩溪婉美二子壽不配德伊孰所使爰有佳
兒天之報君在此

封平江伯夫人崔氏墓志銘

夫人崔氏者平江伯萬峰陳公之配駙馬都
尉京山侯岱屏公之女也母永康大長公主
生夫人夫人幼年性婉婉動容端慎京山公
鍾愛之甫及笄先平江武襄公爲萬峯公擇
配聞其賢委禽焉遂歸夫人之歸也克修閨
道事舅姑以孝敬聞撫恤媵婢尤單惠愛于
是閨門雖肅內政式和視古之賢淑若采蘋

小星者實媿美焉殆武襄公卽世萬峰公繼
爵夫人寵授今封益自謙抑佐姑修祀益虔
罔懈公日侍

禁庭數被 簡召夫人夙興以待供具悉備自
非休沐不敢寧處比公充總兵官往鎮兩廣
水陸幾萬里夫人偕之顧廣多瘴癘未幾夫
人遘疾是時潮賊倡亂公奉

命征討興師屈辰夫人恐其內顧起謂公曰君
世受國恩身膺重寄宜戮力除寇以紓

宸慮勿以閨壺之故擾亂韜鈴也公乃壹志殫
猷卒平大懟師旋夫人病轉劇俄飛語

上聞有 旨召公還京夫人喜謂公曰貝錦成
文自古已然惟得從君生還以奉姑氏幸矣
遂戴病適返比三月始達留都留都公有先
世甲第丘壟在焉因駐節迎醫逾月竟弗起
時嘉靖癸亥七月廿九日也距生乙未九月
九日年纔二十有九卒之日置酒中堂大會
姻黨與之訣別曰遠隔吾姑竟爾告逝終天

之恨殆不瞑目若夫人者可謂生順死安達
於幽明者矣夫人知淨因喜善果聞雲堂金
刹有建飾者輒量施予生男女各一男曰胤
兆茲公卜以 年 月 日葬夫人於近龍
山祖塋之次乃持大常石城許公狀詣余請
銘余乃知夫人遵禮戒盈宜家克相可謂鍾
靈造化毓秀仙源扼於命數內外共悼者矣
是宜銘銘曰繫昔淑媛芬芳彤史匪曰永年
惟德是紀温温夫人璇源肇啓中道奄息令
聞曷已璧埋光沉亦云不死我銘在鐫白石
齒齒

廣林維公配張黃孫孺人墓志銘

廣林維公者涇陽縣人也以嘉靖三十年辛
亥正月二十一日卒卒十有七年季子遵舉
乙丑進士越明年

今上御極改元隆慶遵卜以是年七月八日奉
公暨黃孫兩孺人柩合葬于母張孺人塋遵
涕泣叙狀詣余請銘墓石余雅重進士君比

余從孫紹先聘君女不葬。按狀公諱昂字
民望金大定間祖諱榮夫者于先塋手植數
栢今逾二十圍云數傳至克明克明生仲德
仲德生大犬生鵬鵬生斌咸有隱德斌生壽
恩榮壽官壽官公在成化間善醫藥雒氏以
醫名自壽官公始壽官公配李氏生維號西
村公配張孺人以弘治丁巳二月二十八日
生公公生有異質王幹備願祿度豁爽少讀
父方書博極軒岐素問及俞扁諸家醫書疾奏
功若得神授嘉靖戊子疫氣大作邑里賴以
全活者蓋數百人公診視人病雖風雨晦冥
亦不少避貧而病者輒觀遺之縣侯霍君痰
火劇作公投劑頃愈侯喜欲厚謝公公曰官
民一體候病猶民病也侯病某醫醫民固在
侯矣是時霍政頗急公以是諷之大司徒康
僖王公雅重愛公號曰廣林蓋取活人衆廣
媲美士林而光祿卿谿田馬公稱述公名重
關輔不直以醫道也公平生尤以孝義著聞

西村公家漸裕饒增廣田園公跪進曰田園
與陰德孰優也西村公曰陰德優也公曰大
人增廣田園爲子孫計厚矣曷若廣種陰德
爲子孫長久計邪西村公喜輒爲罷止後食
費衆繁兄弟析居公顧田廬硤敝者取之嘗
輸地一區以贍族人之葬里人或以事爭者
咸以質公公一言卽解後里人構訟或廢產
業益追思公云配張孺人同邑鄉飲者賓繁
女孝敬恭勤妯娌化之諸子雖幼愛而能教
繼黃處士輅女始年八十飲倉衣服必躬必
敬勸公証師以訓諸子再繼孫處士梅女宜
慈惠和蓋紹休張黃二孺人云史氏曰余讀
廣林公狀而知天道之有徵也夫天道無恒
常與善人今觀雒氏累世積善至遵以博學
懿行崛起甲科膺仕榮遇固未可量也詩曰
瑟彼玉璫蓄流在中其雒氏之謂哉狀述公
得壽五十有五張年三十有八黃年四十有
三孫壽六十有六距其始終張生于弘治丁

已十二月二十二日卒于嘉靖甲午十一月
八日黃生于弘治乙丑十一月十一日卒于
嘉靖丁未正月廿日孫生于弘治庚申十一
月十四日卒于嘉靖乙丑十二月二日公三
第一姝曰講曰寵曰官三原王軒者姝夫也
張生男子三人長遠取張氏次遐取勝國趙
平章曾孫女次即遵取李氏女一適三原張
密孫男女十人男六于喬于句遠出于方于
襄遐出于仁于翰遵出女四長適馮女次
聘申諍次即紹先次尚幼墓在縣治東北侯
張里銘曰神農肇醫妙用難傳其用伊何保
壽全年荷與廣林玄機夙頌我思古人入室
仲景孺人相之實曰三良誕發厥嗣邦家用
光侯張之原封樹維宅百世考賢視此銘石

絳縣知縣唐公墓志銘

嘉靖戊戌冬十月余奉旨京師斬然在叻南
莊唐公之子堯卿詣余再拜因述公臨終屬
堯卿曰我死必三渠子銘我比選兆韋曲龜

筮報吉將以是冬十二月二日塋焉敢圖諸
執事余惟公配實余姑氏乃先祖母封太孺
人張氏所生而公之愛我教我無異諸子追
念往昔憂心如焚焉忍執筆銘邪悲夫悲夫
公諱夢璋字應德咸寧縣人高祖文成生雲
雲生義義生銘號素菴以景泰庚午鄉薦累
任山西孟縣教諭素菴公生三子長夢珠驛
丞次夢玉縣丞次即公也公器度溫和鬚眉
秀朗甫十歲受易于鄉進士劉先生十七爲
學官弟子昌時石滌楊公虎谷王公相繼督
學每試輒居高等顧數不第公遍索群籍益
肆閱博正德癸酉就試始第年三十八矣迺
會試又數不第嘉靖丙戌始謁銓部授山西
絳縣知縣絳巖邑也俗謾而媮民瘠而悍公
下車乃嚴立約束申諭備至乃以稼穡蠶桑
勤儉爲訓諸不奉約束者公咸寘于理久之
絳人感悅無有不化者公于是興學崇禮菴
老恤孤繕城郭葺廨宇鋤豪橫招流逸百廢

振修一時山西言吏治者必曰唐公唐公庚寅公以足疾歸故里明年辛卯買地于鮑陂之南築亭列圃種竹灌花意興有得便欣然忘倦因號南莊云王子曰昔南莊公與余先大夫江涯府君少同學長同誡愍懃締好蓋四十年如一日也及公宰絳先府君以御史言事謫萬泉典史萬泉去絳纒百里耳南莊公政蹟先君皆嘗見聞固如狀云云者前年南莊公歿先君嘗痛哭之未期年而先君亦棄養矣余執筆泫然涕泣也悲夫悲夫公天性侃直尤篤孝友母孺人張氏歿居喪送死咸遵禮度衣履雖久著整潔如新殆非有意然者距生于成化丙申十二月二十五日卒于嘉靖丁酉五月十一日得壽六十有二男子四人堯卿娶宋氏堯相娶李氏堯輔娶宗室女堯佐縣學生娶張氏女一適宗室誠潤孫男三訓謨諭孫女三未聘狀諸子姿儀端潤咸余姑氏出也乃投淚爲銘銘曰胡蓄之

豐胡施之裔抑施匪裔亦旣樹德人之懷之
絳水不息謂予不信徵此銘石

恩榮官雙泉韓公配孺人趙氏墓志銘

隆慶六年壬申六月十二日雙泉韓公卒再
逾年爲萬曆甲戌公子灼等卜以是年四月
十七日啓公配趙孺人之壙合而葬焉乃持
儒宮王朝進狀介郡博王承華詣余請撰志
銘余與公爲比鄰世締姻好又公孫女許聘
余孫紹貞何辭焉志曰公諱洲字子瀛雙泉
別號也其先爲晉陽名家始祖清甫宦遊關
中遂占籍咸寧爲永興里人清甫生伯通伯
通生安道安道生仲仲生思秀思秀生鑑鑑
生璠娶趙氏繼李氏凡生丈夫子六公最少
關中人稱爲韓六云公軀幹魁梧音吐洪亮
年十三隨父業賈弱冠遊吳越有日者推命
爲公喜曰爾年四十當大富公遂感勵鷄鳴
卽起非疾病靡敢間然善心計與時逐其所
獲贏蓋得廉賈之術晚歲貲雄如日者言云

嘉靖癸丑歲大侵郡守勸公助賑公易粟宅方躬督推輓先後凡若干石郡守嘉之檄請當道例授徵仕郎嘗晨出見一人號泣有窘厄狀公問之曰昨遺貸金欲歸自裁耳公惻然如數予之聞者感歎其愛人喜施顛如此公善事二親養生送死曲盡心力伯兄洪擅財析居公仍以已獲田產讓之次兄澍沐爲之感動復與公共爨怡怡終身焉兄子炳耀教以成立而炳商于維揚矢與灼等協力克家恭順謙約行合理道韓氏之盛甲于關右矣距公生于弘治壬戌九月廿九日壽七十有一配趙孺人長安右族父信母廖氏於正德丁卯七月二十日生孺人命儀合德禪贊內政先公二十三年卒是爲嘉靖庚戌四月廿一日年四十有四繼配屈氏趙生子凡七男三長郎灼登仕郎娶許氏徵士宗召女次炤膺典膳娶張氏壽官格女次桂宗人府儀賓配宜川王府高郭縣君初名煥避宜川府

諱更今名女四長適王朝重生一女選配爲
秦王妃封兵馬指揮次適張輝次適舉人秦
可貞次適趙宋孫七堦府學生娶趙氏僉事
河女卒繼宋氏縣學生詵女許出如宗聘張
氏給事中齊女如愈聘曹氏舉人文女如億
公令爲炳嗣如胡尚幼俱張出如韶如范桂
側室王氏出孫女三長許出適舉人楊信次
縣君出聘余孫次張出尚幼墓在城南章曲
之原銘曰井耕胡獲弗善胡祥天道靡忒孰
謂杳茫於維雙泉行履昭明趙也相之而熾
而昌澤貽後人泉流共長

太學生李純夫配王氏墓志銘

純夫爲兒時姿儀端潤應對詳敏先祖母張
太孺人悅之許結婚好十四歲爲國子生十
七而取余妹是時純夫固壯每值宴會必索
巨觥飲滿舉白且時與優伎走馬章臺先中
憲府君憂之百計勉諭純夫自若也久之性
成形容槁悴年二十八而死先是丁酉三月

十一日余妹病卒純夫出郊卜地不能跨驢
余戲謂之曰汝不臘矣距其歿實嘉靖戊戌
十一月四日也惜哉妹余母張恭人所生貞
儀淑姿不傲修爲佐祀禮賓式合矩度始鮑
暨雷性嚴有法妹夙夜祇懼飲食必親意或
不憚第長吁也已卒時年二十七正德辛未
三月一日誕辰也惜哉夫純夫自高祖李才
卿逮祖琰父鑑世濟其德鑑歿五月純夫始
誕君子謂積善之徵仁者之報顧俾無嗣以
死是雖純夫爲之亦不可不謂之數也純夫
一兄曰孝思蚤卒妹生一女曰六姐許配張
袞側室王氏茲雷孺人卜以辛丑十二月十
有九日合葬純夫於樂遊原余披淚志其略
如此鮑生純夫於正德辛未十一月十八日
永思其名云銘曰胡俾爾生胡奪爾年溪雲
岩月爾胡爲然絜絜息女慰爾重泉百世並
藏不崩不騫

晉府左長史竹谷馬先生墓志銘

晉府左長史竹谷馬公在任六年勞勩著聞
王䟽請於 朝進階中憲大夫服迎之父駢
贈奉政大夫母妻贈封爲宜人云公既荷
錫命迺乞假西歸告謁丘壠維時錦誥儀文彪
炳翕翹觀者殆數百人嘆曰馬先生孝哉居
無何王數遣人至且諭書曰先生孤心膺也
先王之所屬也君縱念桑梓如先王與孤何
公感激如晉未幾病卒實嘉靖己亥九月二
日也年六十有三王聞之痛悼累致奠賻遣
人護柩還長安越明年庚子公子魯等將以
冬十一月八日塋公於草場坡祖塋之次迺
持陽曲李生狀詣予乞銘狀曰公姓馬氏諱
朋字正甫別號竹谷咸寧縣人也高祖諱繼
名繼名生志志生榮榮生奉政公娶宜人陳
氏於成化丁酉八月十八日生公甫數歲奉
政公携家如處州爲煮海計遂籍爲處州人
弱冠始就學師事畏齋姜先生公日夜矻矻
無間寒暑久之爲處庠弟子員諸弟子員皆

弗公若也弘治壬戌奉政公夫婦繼歿家四壁立公如楊州依舅氏陳公茂居焉未幾還關中稱貸於外祖張氏商遊諸邊公騎行野宿手不釋卷丙子鄉試中式公如浙扶奉政公之樞西歸行經函谷風雨暴至從者恐其漂泊皆趨避之公抱棺號泣風雨頓止庚辰下第禮部乃乞 恩授新鄉縣學教諭辛巳

今上龍飛車駕經新公供奉御膳咫尺 天顏有鼎鼐試和羹之詠先是諸生鮮克向學公嚴立科條因材課業雖風雨靡間也蓋自是科第連舉者數人凡在新六年憲臣累疏諭薦丙戌吏部以臺諫員缺疏堪任者若而人公名預焉時部檄爲使者逗遛至新獨後及公詣部而臺諫業已選矣當路者惜之除授南康府同知公至即攝府事迺定規畫節浮浪覈稅役杜請謁興學崇禮敦行黜邪郡中大治先是漕卒轉餉輒散其舟奪民舟代之

因肆標掠公檄諸當道繩以重法遂著爲令
劇賊某等號九性漁戶橫行鄱陽公嚴立墩
堡教習水戰禦之賊不敢犯已丑擢今官時
晉端王嚴察輕侮輔臣公敷陳仁義輒寓規
諷王敬憚之內寵院夫人歿王欲斬哀行三
年之喪公執禮固諫事遂寢端王薨公竭力
襄事奏立今王間有爭繼者百計傾公公不
爲挫自是諸宗藩益驕獷不法公一一疏聞
始歛跡云公沉靜寡言孝友天成二弟昆肪
教鞠備至其憫孤恤貧睦族和鄰嘗若不及
故所至人敬思之配張宜人咸寧處士鑑之
女端婉淑慎公多賴焉生子凡六人男三長
郎魯娶秦氏次壯娶王氏次質娶劉氏女三
長適孫澤次適韓惟睦次聘張交孫男二果
魯出聘蕭氏閑質出孫女三俱幼然諸子咸
端潤能自樹立君子謂竹谷先生瞑目矣用
賓辱公知愛幾三十年乃不辭而銘之銘曰
嗟嗟竹谷寶劍含鏘光射斗牛利別盤錯菁

我教息其宗頌微千載寥寥維子繼之乃陟
藩輔有力如虎謔言驚師不茹不吐 帝曰
良哉錫爾寵綸金紫煌煌爰賁爾身嗟嗟竹
谷允宜繁祉孫子振振亦云不死於維茲吁
下有明賢我銘在鐫永垂萬年

張季公配孺人宋氏合葬墓志銘

孺人宋氏者四川右叅政澹庵先生廉之女
壽官張季公穉之配鄉進士崇菴先生鑑之
繼母也初季公繼配靳氏既卒崇庵君欲勸
之娶占于焦顛易林遇无妄之需其繇曰主
母多福天祿所伏居之寵昌君子有光崇菴
君喜以告季公曰母氏當繼無疑也于是聞
孺人之賢竟婚媾云居無何季公携孺人商
于淮揚淮揚多巨商大賈諸巨商大賈婦女
每遇宴會輒以服飾競鬪侈靡孺人屏絕故
習泊素自將諸商賈婦女見之無不竊笑者
嘉靖癸未季公卒辛卯崇菴君卒然張氏族
巨賈雄故兩喪歸塋長安孺人咸淮揚居守

嘗痛悼崇菴君蚤亡疽發于背乃于嘉靖丙申歲十二月十一日死嗚呼賢哉王用賓曰昔余舅崇菴先生之歸塋奉公也余以母憂家居嘗獲侍云一日道孺人賢曰母氏晨興獨先宴息獨後佐治賓祭必腆必潔其恭也有如此者曰母氏衣不重帛食不兼味澣濯縫冪咸有法式其儉也有如此者曰母氏義方訓子惠和處婦撫鞠諸孫終始如一其慈也有如此者夫恭德之著也儉德之守也慈德之正也君子謂張母孺人有三善焉孺人以成化戊子十月初十日生壽六十有九母宜人冉氏孫男三棟格模孫女二皆崇菴君之配王氏所出曾孫男五褒交來育音曾孫女三余母恭人實崇菴君母弟也棟也扶柩西歸以嘉靖丁酉十一月廿有七日窆孺人于季公之墓用賓厠在孫列故志之而復銘之銘曰赫赫宋氏肇自元衍世濟其德亦以文顯孺人篤生嫻婉蓋鮮易貴富家詩言聖

善孺人則之宜壽而戩漢城之東有封若嘯
我銘既鐫百世斯聞

後岡呂君墓志銘

今淮南煮海之利甲於天下巨商鱗集溺而
忘返者十居八九長安呂君商幾二紀一旦
治裝圖歸或曰子更十年萬金可致也君曰
河清難俟人壽幾何吾衰矣不則有悔竟辭
歸歸之日揚之士友暨諸商雄文巨軸共餞
於郊門之外觀者如堵有感動泣下者君既
抵家謁先壠葺理故廬日與里之父老結社
醜會越八年而病作不起是爲隆慶庚午七
月廿四日壽六十有四其子時中卜塋報吉
持鄉進士李呈瑞狀請余銘墓曩余官留都
稔聞君名比謝政歸君數候余爲誦說人倫
欣然願受退輒語時中曰小子識之違公教
者非夫也余聞之喜曰孰謂呂君商邪余既
知君余固當銘矣按狀君諱惠字伯濟號後
岡五世祖敬臣敬臣生韜韜生斌斌生鐸鐸

生勤勤善賈娶賈氏於正德丁卯十月廿四
 日生君甫十齡父病訣別亟呼君曰爾善紹
 吾業君跪泣曰讀書顯親兒所志也父諭諭
 領之遂卒君居喪如成人襄事既竣延師就
 學孳孳淬勵年二十而賈不祿君既失怙恃
 乃紹述先志商遊於兩都吳越之間又十年
 始遷揚焉君風姿秀朗論事持正排難解紛
 數言即决人以是推為長者云乃若浩然西
 歸卒遂首丘可謂約有定見變脫流俗者矣

語曰利令知昏孰謂斯言可盡信哉君娶吳

氏咸寧處士順女主饋脩祀勤敬自將生男

一即時中配永壽王府栢井鄉君封宗人府

儀賓女一適永壽王府輔國中尉惟劬孫男

二長壽孫次福孫孫女二俱幼時中守禮克

家不隕先聲君可謂不死也已為之銘曰維

萬曆元年春正月丁酉維吉鴈塔之陰有闕

玄室曰君至止封樹翠嶺不騫不崩百世考

德

贈通議大夫都察院右副都御史張公配
淑人孟氏合塋墓志銘

贈通議大夫都察院右副都御史張公暨配
贈淑人孟氏者陝西巡撫大中丞少渠公之
大父母也隆慶二年戊辰

天子冊建元良 單息臣下少渠公以右副都
御史總督浙江直隸江西軍務因病在告獲
贈封三世如制云明年己巳

上再詔公巡撫陝西公即馳如關未踰碁外靖
邊圍內殲巨寇諸凡大政修舉靡遺追大父
母沒世滋久未聞幽潛比荷 綸褒感激遭

遇乃自述世行請前史用賓撰銘墓石曩余
叨廁南銓公時在諫垣正色直聲中外傾慕
余每遇公官署受益良多頃徵余銘情辭懇
至嗟乎是可以觀中丞公之孝矣用賓雖鄙
敢不勉承公之休德狀曰大父贈公者諱洪
字本實世直隸博野縣人也祖貴木樂間任
湖廣潛江縣白狄驛驛丞潛風土淳沃白狄

公買地卜築舍第三子端占籍遂爲潛江人
端娶李氏生二子長濟次卽贈公也贈公父
蚤卒母李貧甚贈公負販於襄郢荆沔以供
養殮有子路負米之風少美丰姿或欲妻之
公曰兄未受室顧可先耶正德丙子歲大侵
贈公鬻衣煮粥以飼貧人是時道殣相望公
躬執鋤鍤率童僕瘞埋惻然忘倦性倜儻寬
恕內無城府意有所屬必以告人否則如物
哽咽必吐而後已里中有競者贈公一言折
其是非無不恬服其視中丞公也卽垂髫若
嬰兒飲食卧起撫育曲至惟學業罔功輒加
朴責曰何耕弗獲何賈弗售爾當績學樹立
乃庸庸效吾爲也於是中丞公感勵遂爲聞
人嘗以博野先壠在天一方治裝戒行亟圖
展謁先期試騎左股墜傷竟弗克往每一念
及輒拊膺長太息云配淑人孟氏有至性事
始李夫人以孝敬聞李夫人治家嚴整淑人
少有過差夫人端坐跪責不令之起不敢起

督課織紡終歲限布縑若干淑人蚤夜僕僕如期告成贈公由是家漸饒裕贈公嘗易一帕爲李夫人壽偶遺衣笥中淑人顰頰曰有母嫂在何私若妻子也贈公諭之淑人意始釋其它飲食衣服類若此用賓撫狀嘆曰先民有言明德之後必有達人積善之家必有餘慶乃若中丞公雄才醇學督撫五省膺功偉績彪炳後先行將光輔

聖明康濟海內贈公夫婦益永有終譽美天之施報善人固有徵也贈公生於景泰壬申十二月初九日卒於嘉靖戊子九月初七日壽七十有六淑人生於成化戊寅四月二十四日卒於嘉靖庚子四月二十三日壽七十有三各以其卒之年塋於祖塋之次孟淑人生男女各一男卽中丞公父龍潛公贈通議大夫都察院右副都御史娶胡氏封淑人女嫁周麒孫男六長卽中丞公師載娶羅氏封淑人次卽時棫生員娶鄧氏次師戢娶吳氏次

師成娶鄭氏次師儀娶羅氏次師戢生員娶
董氏孫女三長適陳天瑞次適周鯨次適蔣
士良曾孫男七志學生員娶李氏中丞公出
志子生員娶譚氏師戢出志孝生員娶彭氏
師成出志孔生員娶萬氏師戢出志孟生員
聘周氏師儀出志遜生員娶謝氏師戢出志
淳娶蔣氏志厚聘郭氏師成出曾孫女五皆
適名家君子是以知張氏之興未艾也爲之
銘曰於爍張宗肇自軒轅潛江派衍植德孔
繁降祥顯族誕發喆孫肅肅中丞邦家願輔
永言貽穀思繩厥武爲龍爲光受天之祐
帝若曰咨爾予賢臣乃推慶源載錫宮綸雙魂
慰止昭哉至仁有鬱佳城維崔之里庚山寅
向毓靈萃祉百世考賢銘石在此

志

卷十三

三

卷之十三 上終

圖書

